



Aqqalu C. Jerimiassen
Atassut

UPA2023/144
14. april 2023

Nalunaarusiaq aallaavigalugu Naalakkersuisut Inatsisartullu ikiorneqarsinnaajunnaarnertik pissutigalugu toquinnarusullutik kissaateqartunut ikiuineq qanoq isumaqarfigineraat, oqallisissiatut siunnersuut: ”Toquinnarusuttunik ikiuineq inuiaqatigiittut qanoq isumaqarfigineripput aamma inuunermik navianartorsiorititsisumik nappaateqartunut tungiuinissamut suliniutit pillugit inerisaanissamut periarfissanik misissueqqissaarnermut suleqatigiissitap nassuiaataa” 1 .

(Inatsisartunut Ilaasortaq Jens-Frederik Nielsen, Demokraatit)

Oqartoqartarpoq toqu inuunermut ilaaginnartoq kialluunniit aqqusaagassaringaa. Taamaattorliuna eqqartussallugu imaaliinnarluni pikkunarpallaarineqarsinnaasartoq, ingasammik qanigisanik piffissaanngitsukkut maanaannaq inuunerminik kipisitsisoqarsimaneranik nanertugaanermik peqartaanni.

Taamaattorli, una oqallisissiaq piffissaasorinarpoq maanna annertusisamik oqaloqatigiissutigissallugu, nuannerporlu oqallisigerusunneqarmat. Ikiorneqarsinnaajunnaavissoqqasoq inoqapput naallituttoq ataqqisariaqarparput, inoqapput inuunissami sinnera anniaaterpassuarnik naalliulluni akiuutiinnaq inissisimalersimasoq, taamaalillunilu toqu toqqarusussinnaalersimallugu eqqissivissani tikikkusukkaa tusarnaasinnaasariaqarparput. Aap, oqaatsit annernaqaat taasakka, piviusorli sumiittarnersoq ilaatigut nipaarsaarutiinnartariaqangilarput.

Nunaqqateqarpugut ajoraluartumik, inuunerminni ikioriarfeerussimanertik pissutingalugu, naaffeqanngitsumik ulloq unnuarlu sakkortuumik timimikkut anniaateqartartunik. Ilannguisalu toquinnarusunnermik ikiorneqarlutik inissisimanissartik allaat toqqarusuttaraluarpaat, periarfissaanngimmalli ajoraluaqisumik avaanngunaraluaqisumillu imminut toqunermik naggasertarsimallugu. Ila oqaaseq avaanngunaraluaq, tamassumunngali pisimasumut tunngatillugu piviusunik uppernarsaataasunik peqarpoq nunatsinni.

Inuup inuunera tamani iluatinnarnerpaavoq, tamattali kinannguungaluarutta kinarsuungaluarutta naassaannngitsumut piunngilagut, killissarput ullut arlaanni takkukkumaartoq meeraallutali ilisimareertarparput. Inoqatittali naalliorusaarnermik inuuneqaannalersimasut, imaluunniit uumatitsissutaannarnik ingerlatinneqalersimasut ikioriarfeeruteqqasut naakkisinnaanissaanut ila uummatigut ammartariaqarigut Atassummiit isumaqarpuguttaaq.

Qujarujussuarpugut oqallisissiamut, neriullutalu uani oqallinnermi naalackersuisutaaq periusissamik arlaannik siunnerfeqalerumaartut.